

centro, así como á derivación de doentes a centros privados, e as actuacións previstas para diminuír esas listas

Comisión 5ª, Sanidade, Política Social e Emprego

- 9338 (10/POC-001616)

Grupo Parlamentario do Bloque Nacionalista Galego

Rodil Fernández, Olalla e 5 máis

Sobre as razóns da desaparición da programación cultural da grella da Televisión de Galicia de xeito progresivo, a suficiencia do espazo *Zig Zag Diario* para o cumprimento do obxectivo de información e promoción da diversidade cultural de Galicia e a valoración pola Dirección da CRTVG da posibilidade de contar con novos espazos culturais, así como as súas previsións respecto do desenvolvemento dalgún espazo específico dirixido aos artistas e ás bandas musicais galegas semellante ao desaparecido *Directos da Galega*

Comisión Permanente non Lexislativa de Control da Corporación da RTVG

- 9492 (10/POC-001636)

Grupo Parlamentario dos Socialistas de Galicia

Blanco Rodríguez, Noela e Álvarez Martínez, Luis Manuel

Sobre os datos referidos ao documental titulado *Fátima en Galicia*, emitido nas diferentes canles da Televisión de Galicia, así como as previsións da Dirección da CRTVG respecto da emisión no ano 2017 de máis documentais de temática relixiosa

Comisión Permanente non Lexislativa de Control da Corporación da RTVG

Santiago de Compostela, 30 de maio de 2017

Diego Calvo Pouso

Vicepresidente 1º

3. Administración do Parlamento de Galicia

3.1. Organización e normas de funcionamento da Administración do Parlamento de Galicia

3.1.1. Normas e acordos

Acordo da Mesa do Parlamento de Galicia, do 30 de maio de 2017, polo que se regula a creación do Tribunal Administrativo de Recursos Contractuais do Parlamento de Galicia

Exposición de motivos

O Real decreto lexislativo 3/2011, do 14 de novembro, polo que se aproba o Texto refundido da Lei de contratos do sector público, establece na súa disposición adicional primeira *bis* que as asembleas lexislativas das comunidades autónomas axustarán a súa contratación ás normas establecidas nesta lei para as administracións públicas.

No relativo ao réxime de recursos en materia de contratación, esta norma establece a necesidade de atribuírle o coñecemento e resolución dos recursos especiais e das cuestións de nulidade contractual a un órgano especializado e independente do órgano de contratación de cada Administración.

No artigo 41 deste real decreto legislativo prevese que no ámbito dos órganos competentes das súas asembleas lexislativas a competencia para resolver os recursos será establecida polas súas normas respectivas e que se deberá crear un órgano independente cuxo titular —ou, no caso de que for colexiado, cando menos o seu presidente— posúa cualificacións xurídicas e profesionais que garantan un axeitado coñecemento das materias de que deba coñecer. O nomeamento dos membros desta instancia independente e a terminación do seu mandato estarán suxeitos, no relativo á autoridade responsable do seu nomeamento, á duración do seu mandato e á súa revogabilidade, a condicións que garantan a súa independencia e inamovibilidade.

Polo exposto, a Mesa do Parlamento de Galicia, ao abeiro do disposto no art. 30.1.2ª do Regulamento da Cámara e no art. 3.2.c) do Regulamento de organización e funcionamento da Administración do Parlamento de Galicia, dispón:

Artigo 1

Créase, con carácter de órgano unipersoal, o Tribunal Administrativo de Recursos Contractuais do Parlamento de Galicia, como órgano dotado de plena independencia funcional, para a revisión dos procedementos de contratación administrativa da Administración parlamentaria.

Artigo 2

O Tribunal Administrativo de Recursos Contractuais do Parlamento de Galicia é o órgano competente para o coñecemento e resolución dos recursos especiais e das cuestións de nulidade contractual a que fai referencia o Real decreto lexislativo 3/2011, do 14 de novembro, polo que se aproba o Texto refundido da Lei de contratos do sector público, así como para a adopción das decisións pertinentes sobre medidas cautelares ou provisionais que poidan ser solicitadas polas persoas lexitimadas neses procedementos.

Artigo 3

1. A persoa titular do Tribunal Administrativo de Recursos Contractuais do Parlamento de Galicia deberá ter a condición de funcionaria do Parlamento de Galicia, posuír a licenciatura ou o título de grao en Dereito e unha experiencia profesional acreditada no eido do Dereito administrativo relacionado directamente coa contratación pública de, cando menos, dez anos.

2. A Mesa do Parlamento de Galicia designará a persoa titular do Tribunal Administrativo de Recursos Contractuais do Parlamento de Galicia.

3. Nos supostos de vacante ou ausencia da persoa titular, a Mesa do Parlamento designará unha persoa substituta, que deberá reunir os requisitos establecidos no punto 1 deste artigo.

Artigo 4

1. A duración do mandato da persoa titular do Tribunal Administrativo de Recursos Contractuais do Parlamento de Galicia ou, de ser o caso, da persoa suplente, comprenderá toda a lexislatura. Logo da expiración do mandato ou no suposto de renuncia, a persoa titular ou, de ser o caso, a

súa suplente, permanecerá no exercicio das súas funcións ata que se produzan as novas designacións.

2. Tanto a persoa titular como a súa suplente terán o carácter de independentes e inamovibles e non poderán ser removidas dos seus postos senón polas causas seguintes:

- a) Por expiración do seu mandato.
- b) Por renuncia aceptada pola Mesa do Parlamento de Galicia
- c) Por perda da condición de funcionarias.
- d) Por incumprimento grave das súas obrigas.
- e) Por condena a pena privativa de liberdade ou de inhabilitación absoluta ou especial para emprego ou cargo público por razón de delicto.
- f) Por incapacidade sobrevida para o exercicio das súas funcións.

A remoción polas causas previstas nas letras d), e) e f) será acordada pola Mesa do Parlamento de Galicia, logo de expediente no que se lle dará audiencia á persoa interesada.

Artigo 5

1. O Tribunal Administrativo de Recursos Contractuais do Parlamento de Galicia someterá a súa actuación ás disposicións establecidas no Texto refundido da Lei de contratos do sector público.

2. As resolucións do Tribunal Administrativo de Recursos Contractuais do Parlamento de Galicia esgotan a vía administrativa e contra elas poderase recorrer ante a xurisdición contencioso-administrativa.

Disposición derradeira única

Esta disposición administrativa entrará en vigor o día seguinte ao da súa publicación no *Boletín Oficial do Parlamento de Galicia*.

Santiago de Compostela, 31 de maio de 2017

Miguel Ángel Santalices Vieira

Presidente